

Кому Республикаса том войтырлөн газет



Висерса акань -
Таисия Михайлова

Тайо НОМЕРЫН

Март 8 лун - тайо аныясос радейтан да наон нимкодясян гаж. Тайо лунсö йитöны Клара Цеткин нимкöд, кодi 1910 воын Копенгаген карын вöзийис пасйыны уджалысь нывбабаяслысь праздник. Буретш саксянь ставныс кутисны пасйыны тайö тувсовъя гажсö.

4
л.б.

Буретш Сретеннö водзын Сыктывкарса коми культура шöриннын паныдаслысны юркарын олысь удораса. «Вежа Важгорт» нима рыт вылö волис быдмысь кöлена да верстьö войтыр. Тайö йöзсö öтвүтiс ыджыд мог: отсавны важгортысалы кыпöдны-мичмöдны Кростослөн Ловзьöм да Вежа Николай вичко.

9
л.б.

Эз на удитны шойччыны Сочиса Олимпиада бöрын «большыцикъяс», бара на найöс виччысьö ыджыд спорт шоу - 11-öd төвся Паралимпиада ворсöмъяс. Спортсменъяс ордйысясны Сочийн март 7-16 лунъясö.

15
л.б.

Аски март 8 лун. Окота мамы, баблы, чойлы да и радейтана нывлы сьöдöмсяныс вöчны козин. Сыктывкарса 80 номера челядь садйын зильысь Вероника Нестерова бара на вöзийö газет лыддысьяслы видлыны ас кион вöчны панно.

16
л.б.



Выль шöрин - выль позянлун

Март заводитчигөн Кörtкерöс районса Важкуръяын востис öдзöсьяссö социокультурнöй шöрин. Регионса культура министрöс вежысь Лариса Ушакова серти, социокультурнöй шöринсö заводитисны лэптыны 2008 воын, но некымын помка понда стрöйба кыпöдöмсö эновтисны. И со кольöм во бара на босычисны уджö. Шöринö пырö культура керка да библиотека. Медшöр пыранинас лöсьöдöма пандусъяс.

Лариса Ушакова серти жö, шöрин сетас позянлун йöзлы колана ногөн колявны прöст кад. Важкуръяса олысьяслы сийö лои бур козинөн республикаын культура вокöд йитöдын. Районнын унатор вöчöны йöзлысь олöм бурмöдöм могысь.



А тэ тöдан ПДД?

Нывбабаяслөн войтыркостса лунö Сыктывкарын машинаөн ветлысь нывбабаяс вермасны тöдмавны ПДД серти тöдöмлуннысö. Ордйысьöмсö котыртö юркарса ГИБДД.

Ковмас решитны ПДД-ысь куйм билет. сылы, кодi медбура сяммас, «Школа экстремального вождения» сетас козин пыдди занятие вылö сертификат.

Медым вочавидзны билетъяс вылö, колö матыстчыны 9 чассянь 16 часöдз республикаса стадионлөн запаснöй поле вылö.

- *Конкурссö дасьтöны автотранспортөн ветлысь шоперъяслысь тöдöмлун-сям кыпöдöм могысь. Овлö, мый правоа нин шопер унатор оз тöд туйвывса индöгъяс йылысь. А он кö тöд теория, кутшöм вермас лоны практика? Матыса кадö ГИБДД-көд öтүв эм мөвп вöчны ас көсийöм серти «вождение на практике» экзамен. Лоö позянлун ас көсийöм серти сгайтны экзамен - донъявны туйвывса правилöяс серти ассыг тöдöмлун, машинаөн ветлыны кужöм, тырмытöмторъяс бырöдöм. Татшöм уджыс ваяс уна буртор, - шуö республикаса автоспорт федерацияөн веськөдлысь Олег Бекетов.*

«Коминформ» серти



ТӨЖД-МОГ



Быд юалөмлы сюрө вочакыв

Март 8 лунө, нывбабаяслөн войтыркостса лунө, 00.00 чассянь 24.00 часөдз «Дөверие телефонлөн» республикаса служба нуодас «Весна и женщина похожи» пось линия.

Психологъяс вочавидзасны быдпөлөс юалөм выло: мый мөвпалөны зонъяс нывъяс йылысь, кызди кажитчыны өти классын велөдчысьлы, кызди отлаөдны удж да семья, кызди быдтыны челядьбөс, мый вылын кутчысьбө гозъялөн олом?

Республикаса службалөн «Дөверие телефон» номер: **8 (8212) 21-11-66** (стационарнөй телефонсянь звөнокыс дон босьттөг). Челябинь телефонлөн отувъя номер: **8-800-2000-122** (стационарнөй да сотөвөй телефонсянь звөнокыс дон босьттөг).

Та кызди колана юөр позьбө аддзыны интернетъсь «Приёмная виртуального психолога» юкөннын, www.komiforum.ru порталын.

Социальной технологияя совмодан регионса шөринлөн юөр серти

ПӨСЬ ЮӨР

Ставөн Ыджыдвиддзө!

Март 15 лунө Көрткерөс районса Ыджыдвиддзын лоө «Лямпиада - 2014». Ордйысьбөмыс пансяс 10 часын. «Коми войтыр» өтмунөмлөн Көрткерөс районса представительство корө ставнысь пырөдчыны лыжөн котралан республикаса фестивальбө. Вермөмысь лоө козин «Коми войтыр» регионъяскостса өтмунөмсянь.

Та кызди корөны ставнысь петкөддыны коми вөралысьлысь мыгөр-образ, торйөн нин школаын велөдчысьясөс. Та выло колө пасьтавыны коми вөралысьлысь паськөм - лаз, сувтны лямпа выло да босьтны аскөд койбедь. Отув вочам коми вужвойтыр гаж!

Көрткерөс районса «Звезда» газетлөн сайт серти



ЛЯМПИАДА



VIII-ой республиканский лыжный фестиваль на лямпах, лыжах, охотничьих и гоночных лыжах на призы исполкома Межрегионального общественного движения (МОД) «Коми войтыр»



15 марта 10:00
с. БОЛЬШЕЛУТ,
КОРТКЕРОССКОГО РАЙОНА



АГЕНТСТВО РЕПУБЛИКИ КОМИ ПО ФИЗИЧЕСКОЙ КУЛЬТУРЕ И СПОРТУ

- Мальчики и девочки 6-9 лет (2004 г.р. и моложе) – дистанция 1 км;
- Мальчики и девочки 10-12 лет (2002-2003 г.р.) – дистанция 3-1 км;
- Мальчики и девочки 13-14 лет (2000-2001 г.р.) – дистанция 5-3 км;
- Юноши и девушки 15-16 лет (1998-1999 г.р.) – дистанция 5-3 км;
- Юноши и девушки 17-18 лет (1996-1997 г.р.) – дистанция 5-3 км;
- Мужчины и женщины 18-30 лет (1995-1983 г.р.) – дистанция 10-5 км;
- Мужчины и женщины 31-40 лет (1982-1974 г.р.) – дистанция 5-3 км;
- Мужчины и женщины 41-50 лет (1973-1964 г.р.) – дистанция 5-3 км;
- Мужчины и женщины 51-55 лет (1963-1957 г.р.) – дистанция 5-3 км;
- Мужчины и женщины 56-70 лет (1957-1944 г.р.) – дистанция 5-3 км;
- Мужчины и женщины 71 лет и старше (с 1943 г. и старше) – дистанция 5-3 км;
- Этап спартакиады НКО – дистанция 2 км
- VIP гонка мужчины и женщины до 50 лет (до 1964 года включительно) – дистанция 3 км.
- VIP гонка мужчины и женщины 51 лет и старше (1963 год и старше) – дистанция 3 км.
- Гонки на лямпах и лыжах (охотничьих лыжах, с мягким ремённым креплением) возрастные категории:
 - Мужчины и женщины до 50 лет (до 1964 года) – дистанция 2 км.
 - Мужчины и женщины 51 лет (1963 год и старше) – дистанция 2 км.
 - Лыжи лыж представителей спортсменов-лыжников (КМС, МС, МСМК, ЗМС) – дистанция 2 км.
 - Специальный лыж (стрельба из пневматических винтовок, дистанция - 10 м., диаметр отверстия из мягких креплений, ширина не менее 10 см).
 - Козин (позьяс) лыж охотничий (лаз), пали охотничий-койбедь.

ГАЗ

Март 8 лун - аньясö радейтан да наён нимкодясян гаж. Тайö лунсö йитöны Клара Цеткин нимкөд, кодi 1910 воын Копенгаген карын вöзйис пасйыны уджалысь нывбабаяслысь праздник. Буретш сэксянь ставныс кутисны пасйыны тайö тувсовъя гажсö.

Сöмын бур боксянь петкөдчисны

Тайö лунö быть колö козьявны дзоридз да козин аслад мамукалы, баблы, чойлы, радейтана нывлы, а тшöтш и оз ков вунöдны висьтавны налы шань да мелi кивъяс.

Праздник водзын юркарса 20 номера челядлөн библиотека-филиалын мунис «Как много девушек хороших» нима рыг. Гаж вылö волисны 21 номера школарысь 5-6 классъясысь нывъяс. Медводз найö тöдмалисны гажлөн история йылысь, а сэсся пырöдчисны конкурс-ворсöмö. Ассьыныс кужöмлун-сямнысö нывъяс петкөдчисны кысьöм-вурсьöм да пусьöм-пöжасьöм конкурсъясын. Таысь öтдор нывъяслы колiс мичаа да аслыспöлöса серпасавны «вундасян пöв» (бумага вылö дасьтöмöс). «Золушка» конкурсын син куньöмөн колiс тöдмавны шыдöсьяс. Удитисны тшöтш и

дасьтыны «тувсовъя букет» - тöдмавны кроссвордысь дзоридз нимъяс. Мыла сьланкывъяс юргисны «Музыкаа калейдоскоп» ворсöмын. «Аукцион» конкурсын

нывъяс уськөдлiсны тöд вылас повесыт-висьтыяс, кытöны паныдасьлö аньлөн ним.

Уна конкурсö удитисны пырöдчыны нывъяс да и асьнысö сöмын бур боксянь петкөдчисны. Гаж помын быдöнлы на пöвстысь вичмисны козинъяс.

*Галина КОНАНОВА,
юркарса 20 номера челядлөн
библиотека-филиалөн
веськöдлысь.*



Кор сёрнитан рыцаръяс йылысь - юрад дзик пыр и визнитö уна нэмсайса кад. Рыцаръяслөн турнир - важся ордйысьöм да аслыспöлöс гаж, көнi мужичöйяс петкөдлöны ассьыныс вын-эбöссö. Сöмын медся вынаяс шедöдлiсны вермöм.

Февраль помын семьялы да челядлы социальной отсöг сетан юркарса шöринын кыпыда мунис «Рыцаръяслөн турнир». А сы водзын «Ребячья республика» öтмунöмысь водзмöстчысыяс дасьтисны щитгыяс да мечьяс. Тшöтш и унатор тöдмалисны рыцаръяс йылысь: вöлөмкö, паськөм-эмбурас быд рыцарлөн серпасалöма торъя пас, и быд серпас мый йылысь кö индылöма-юöртлöма.

Зонъяс ордйысисны «XXI нэмся рыцар» ним шедöдöм могысь. Налы колiс дасьтыны ассьыныс канпас, бура да стöча лыйсыны, вочавидзны викторинаын юалöмгыяс вылö, кужны сöвны «вöв» вылö да верзьöмөн гөнитны.

Рыцаръяс пöвстысь ставнысö вылö донъялисны да ошкисны ичöтик козинъясөн.

*«Ребячья республика»
öтмунöмлөн юөр серти.*

XXI нэмся рыцар



«Капелька солнца» Эжваса библиотекаын вöли «100 юалом верстьöлы» ток-шоу. Тайö шоуыс ёна нин нималис томуров пöвстын, öд сэни позьö сетны сё юалом кутшöмкö интереснöй мортлы, дерт жö, верстьöлы.

100 юалом мездьсьлы

Тайö ток-шоу вылас ныв-зонкöд аддзьсылыны волісны Эжва районса поисково-спасательнöй отрядысь веськöдлысьöс вежысь Андрей Анатольевич Ковальчук да спасатель-кинолог Олег Григорьевич Борецкий. Накöд тшöтш воліс медбур ёртныс - Тима лабрадор.

Час чöжөн гöсьгыясы удитім сетны 63 юалом. Ми тöдмалім, мый Андрей Анатольевич чужломä Инта карын, уджавломä шахтаын. Помавломä горнöй институт да Санкт-Петербургысь Плеханов нима институт. Сы бöрын веськавлöма Интаса горно-спасательнöй взводö, а Эжваö овны локтöма 2008 воын.

Ток-шоулөн мöд герой - Олег Григорьевич - чужломä Кишинёвын. Помавломä Санкт-Петербургысь Россияса МЧС-лөн пытшкөсса войскалысь вылыс тшупöда училище. Спасатель-кинологөн уджалö 2007 восянь. Дерт, налөн уджныс сьöкыд, öд быд-



сяма неминуचाыс мян олöмын овлö. Мездьсьлы колö кужны унатор вöчны. Уджалом кындзи, найö нуöдöны занятияяс 31 номера школаысь кадеть-яслөн классын.

Часыд öдйö и лэбыштис. Медся уна юалом сетьсыясы вичмисны козинторьяс. А ток-шоуса геройясы сиам дзоньвидзалун да терпенньö.

Ульяна ГУДИНА,
«СМЭЖ» пресс-центрысь корреспондент.

ЕНБИ Сыктывкарса 80 номера челядьлы садйын уджалысьяс оз вермыны пукавны нем вöчтöгыд. А торйөн нин сэк, кор юркарын кыпыда пасйöны Йөввыс гаж. Öдйöджык и найö пырöдчöмаöсь юркаrsa конкурсö, көнi донъялöмаöсь Йөввысва чучела-аньясöс.

Медмича коми паськöма Йөввыс ань

Кужысь кияса войтырлөн артмöма зэв на и мича Йөввыс. Вероника Николаевна Нестерова, Ирина Николаевна Набиуллина, Мария Станиславовна Потолицына да Елена Игнатьевна Слесарева пуктöмаöсь став сямсö да сетöмаöсь сылы став сьöлöмсö. А кор пасьтöдöмаöсь сийöс сарапанö - весиг вежныс петöма! Тайö мича аньыд и мунома юркаrsa мукöд чучела-анькöд ордйысьны. И

öд вермöма! Медмича национальнöй серьяса Йөввылөн шуöмаöсь.

Кыдзи висьталісны садйын уджалысьяс, весиг пö жаль вöли сотны ас киён вöчöмтортö. А быть - татшöм нин традицияыс. Кутам виччысьны локтан вося Йөввыс гаж. И эскам, мый сэкся аньясыд нöшта на шензьöдасны мянöс.

Миян корр.



**Эм татшом
удж**

Аски Март 8 лун. И буретш öнi окота нöшта öтчыдысь пасйыны, кутшöм енбиаöсь да киподтуяöсь аньяс: быдтор кужöны вöчны, быдлаö сяммöны, оз повны некутшöм уджысь ну.

НИНÖМЫСЬ ОЗ КОВ ПОВНЫ

Вероника Кирпулевакöд тöдмасы АЗС заправкаын. Сэни сйö уджалö медшöр операторöн. Видзöдан сълöн удж вылö, да юрид бергöдчö: машинаяс бензинöн заправитöм кындзи сы мында на колö тöдны-кужны. Аслас удж, олöм йылысь окотапырысь висьтасис Вероника.

- Школа помалöм бöрын Вильгортын велöдчи станочница, гервообработчица вылö. Сöмын эг гыр уджав бöрийöм специальность серти. Сэсся вузасысь велöдчи, а водзö нин босьти АЗС-лөн оператор специальность. Веськалi юркарся автозаправка вылö. Медводгза воö нин заводитисны велöдны медшöр (старшöй) операторö. 2012 воын вуджи Вильгортса заправкаö и öнöдз на со тан. Öтув уджалан стажыс квайт во, - висьталö ныв.

Вероникалы аслас уджыс кажитчö. Дерг, быд уджын сiдз шусяна «плюсыд» да «минусыд» эм, но медшöрыс, мед эськö сьölöм сертиыд вöли.

- Кажитчö сёрнитны-варовитны заправкаö локтысьяскöд - он и тöдлы, суткыыд лэбыштас. Гашкö, мукöдлы чайтсьö, мый абу нывбаба удж бензинöн ноксьöмыд, но, ме серти, абу тагз. Унджык кагсö вöдитчам кассаöн. Ковмылö и мукöд удж вöчны, шум, бензовоз примитны, резервуарысь бензин мерайтны - ставас велалан. Да и шопер либö слесарь отсасылöны. Тэнлы вылö кö уджыс - öдгйö велалан. Унаöн босьтöны машина право, а кар кузя сэсся полöны ветлыны. Танi тагзи жö. Быдторйö колö велавны, - висьталö Вероника.

Вероника шуö, мян уджын пö быдсымасö аддзылан. Овлö, мый «пистолетсö» бакысь кыскытöг мунöны. А коркö öти ныв, газетö гижлöмаöсь весиг, быдса заправитчан колонкасö нуöма. Шензы кöть эн сэсся.

- Шоперлөн ылаlöм понда эмбурным и тшыкö. Тидкыда татшöмыс овлывлö «час пикö», и ёнджыка, 90 прöчентыс, мужичöй-



яслөн ылаlöм понда, - шуö ныв.

Вероника и машинаöн повтöг ветлö. 12 арöсын нин руль сайö пуксьöма, а правсö босьтöма 20 арöсын. Операторöн уджалiгөн велалöма бензин дук сертиыс тöдмавны сылысь сикассö, торйöдны бурджык марка. Тайöс весиг мужичöй пöвстысь оз быдөн сяммы вöчны. А нöшта Вероника отсалö вöчны йöзлы керкапытшса дзоньтасян удж: штукатуритчöшпалеритчö. Вермö вöзйыны, кутшöм рöм бурджыка лöсялö сйö либö мöд жырйö.

Прöст кадыд Вероникалөн оз

и овлы. Удж кындзи колö быдтыны челядьöс. Никита ыджыдджык пиыслы кажитчö таэквондо, ориентировка, а Анжелика нылыс радейтö серпасасыны. Водзö вылö Вероникалөн эм уна мöвп. Медшöрыс - верöсыскöд лэптыны аскерка, быдтыны челядьöс. Медставыс артмас.

Март 8-öd лунöн Вероника чөлöмалö став нывбабасö, а торйөн нин уджёртгьяссö, тайö кыпыд гажөн. Сиö терпеннö, дзоньвидзалун да помтöм-дортöм мичлун.

Екатерина МИКУШЕВА.

Снимокыс авторлөн.



Айму

Сыктывкарса Коммунистическөй улича вылын эм памятник - «Скорбящий воин». Салдат пуксьома из вылө, мышку саяс сьёкыд ноп, юрсö лэдзöмөн видзöдö муас. Сійöс позьö гөгөрвоны, ачыд кө прöйдитан война пыр либö сёрнитан салдаткөд.

Медым мамыдлы бура узьсис

Быдунъя лунö гежда кывлан геройлысь висътасьöмсö. Но кор паныдасьöны вöвлöм салдатъяс, сёки казтылöмлы пом ни дор абу.

Февраль помын челядлөн содтöд тöдöмлунъяс эжваса шöриннын казтылысны 1979-1989 вося сьёкыд кад. Ныв-зон дасьтылысны воём гөсьтъяслы неыджыд концерт. Медводза радын пукалис Вадим Анатольевич Мальцев - пинь бурдöдысь, Афганистанса салдат, служитлöма парашютно-десантнöй войскаын. Ставнас рыт вылö волис сизим герой, но Вадим Анатольевич öтнас локтис формаён, морöсын медальясөн. Концерт дырйи лöсьöдiс неыджыд клип, кодöс сiöма öтлаын служитысь ёртъяслы. Мойвиис ськөд сёрнитны.

- Кутшöм кывъясөн тiянöс мөдöдiсны Афганистанö?

- Миянлы пыр шуисны - тайö колö, медым мамыдлы бура узьсис. Тайö кывъясыс меным тырмисны, отсалiсны воны помöдз, бöр локны гортö.



- Мыйла лоинныд бурдöдысьөн?

- Война бöрын нин бöрйи тайö уджсö, а мыйла, ог вермы гөгөрвöдны.

- Эм-ö кутшöмкө видзöг-талисман?

- «Шуда шапка». Сiйö вöли мекöд быд тышын да и öнöдз на помся орын, куйлö машинаын. Менам Сергей ёрт пыр шуö: «Шапкасö видз, олөм чöжыд отсавны кутас!» Со и видза сiйöс.

- Öнi шудаöсь олöмад?

- Ставыс бур. Олöмад пыр мыйкө колö вöчны, мыйкө шегöдны.

- Кажитчис талунъя концертс?

- Бур, мый вöчисны татшöм гажсö. Нимкодъ аддзысьлöмысь, сьöлөмöй весиг тiпкö.

Вадим Анатольевичкөд сёрнитгөн сьлөн сöстөм синмö видзöдлөм бöрын гөгөрвои, мый йылысь «мөвпалö» «Скорбящий воин» памятник: казтылö тышса ёртъяссö да мам пондаыс майшасьö, медым сылы бура узьсис...

Арина ХИДЧЕНКО,
«СМЭЖ» пресс-центрысь
корреспондент.



ВОДЗМӨСТЧӨМ

Март медводдза лунö Сыктывкарын мунис «Science Slam» - наукаслөн ордйысьём. «Science Slam» - тайö войтыркостса проект, лөсьөдöма наука уджъяс кокниа гөгөрвоодом могысь. Быд сёрнитысь туялысьлы сетсьö дас минут гөгөрвоана висьтавны став йöзлы, весигтö челядьлы, аслад удж йылысь.

Мый сэтшöмыс «Science Slam»?

Артмис тайö нырвизыс 2010 воын Германияын. Россияын уджтасыс заводитис пöртсыны олöмö кольём вося апрельын Санкт-Петербург карын. Öтчыд нуöддöмаöсь Самараын. А öни со ордйысьём медводдзаысь мунис миян Комиын.

«Science Slam»-лөн шöр могөн лоö гөгөрвоодны ыджыд чукöра йöзлы наука уджъяс сідз шусяна неформальной инын, абу, шуам, конференц-залын, а кафеын. Сідзи жö и лоис миянын - слэм мунис «Трамвай» антикафе борд улын.

Гöсьгыясөн вöлины школаса велöдчысьяс да студентъяс, верстьö йöз да прöста кывзысьяс, кодъяс



кöсьисны тöдмавны наукаын виль нырвизьяс йылысь да сідзжö кывзыны туялысьяслысь сёрни.

Наука ордйысьём нуöдис Евгений Стокоз, кодi висьталис «Science Slam» наука дорйысьём да артмём йылысь, тöдмöдис йöзöс туялысьяскöд.

Танi петкöдчисны студентъяс да Коми наука шöринын туялысьяс. Медводдзаөн сёрнитис Дарья Минина - психолог, кодi висьталис аутоагрессия йылысь. Сийö кöсьйö гөгөрвоны, мыйла йöз куритчöны, та серти нуöдö торья анкета да анализ. Софья Мерц сёрнитис программирование да лин-

гвистика йылысь. Чайтсьö, бытгыö тайö наукаслөн абу öткодлуныс, но Софья гөгөрвоодис, мый тайö наукаяс подулөн программирование отсöгөн позьö лöсьöдны ассьыд кыв. Алексей Черных - медик, туялö гипоксия тема. Алексей висьталис, мый сийö сэтшöмыс да тöдчöдис, кутшöм ингыасын мортлы оз тырмы сынöд да кутшöм помкаяс вöсна.

Ольга Сокрушева туялö химия наука, сёрнитис антиоксидантьяс тема серти да пасйис, кутшöм сёянын найö эмöсь. Михаил Мигловец - биолог, сёрнитис ставмирса шондöдöм йылысь, нöшта гөгөрвоодис, мый сэтшöмыс «парниковой эффект». Ставыс тайö чайтсьö зэв сьöкыдөн да гөгөрвотöмөн. Но туялысьяс сэтшöм бура ставсö висьталисны, мый быдöнлы лои гөгөрвоанаөн. Туялысьяс сёрнитöм бöрын гöсьгыяс сетисны ассьыныс билет кажитчана туялысь вöсна. Став билет лыддьöм бöрын медводдза места босьтис Ольга Сокрушева антиоксиданты темаөн. Зэв нимкодь, мый Ольгалөн сёрниысь сетисны медся ыджыд дон, кодi торьялö комын гөлöсөн. Приз пыдди Ольгалы сетисны боксёрлысь перчатки, кодi лоö быд наука ордйысьёмын вуджан козинөн.

Сыктывкарын «Science Slam» нуöдис енбия нывка, Сыктывкарса университетын витöд курсса ве-

лöдчысь Зоя Канина. Ми юалим Зоялысь, кыдзи сылы воöма татшöм мөвп - нуöдны ыджыд проект.

- Ме тшöкыда ветлывла ыджыд каръясö, кöни пыр муно кыпыд удж, нуöдöны виль сикас проектъяс, - висьталис Зоя. - Танi, Сыктывкарын, татшöм сикас удж эз на нуöдсыв и, дерт, танi оз



тырмы ыджыд каръяслөн кыпыд руыс. Ме тöдмалi тайö проект йывсьыс да окота лои пöртны сийöс олöмö. Зоя тöдчöдис, мый Сыктывкарын эм уна енбия йöз, кодъяс вермöны петкöдчыны асла уджъясөн. Сы серти, уджыс вöлöма зэв сьöкыдөн, но öд ставыс артмис! Зоя сідзжö пасйис асла котыр йöз йылысь, кодъяс отсасисны наука ордйысьём нуöдöмын: Виталий Игумнов, Анастасия Ларукова да Александр Чупраков.

Ыджыд атгыö Зоялы сылөн уджыс, виль нырвизь вöстöмысь да наука уджъяс кокниа гөгөрвоодöмысь! Чайтам, мый öни тайö проектс заводитас уджавны кыпыда да вылыс тшупöдын!

**Ирина
КАРМАНОВА**



АДДЗЫСЬЛӨМ

*Бурети Сретеньё водзын Сыктывкарса коми культу-
ра шöринын паныдасьлісны юркарын олысь удораса.
«Вежа Важгорт» нима рыт вылö воліс быдмысь көлена да верстьö войтыр. Тайö
йöзсö öтуветіс ыджыд мог: отсавны важгортсалы кыпöдны-мичмöдны Крис-
тослөн Лоезьöм да Вежа Николай вичко.*

Öтвыв ловзьöдам Важгортлысь вежа русö

Паныдасьлөм дырйи гöсьтгьяслысь сьölөмсö бур-
мöдінсны чужанін йылысь кывбургьяс да мыла сьы-
ланкывгьяс. Землякгьяслөн чукöртчылöмыс тырис
югыддунөн да сöстөм руөн. Некод эз лок татчö «куш
киөн». Кодкö вайис кыпыд мөвп, кодкö - нюм, кодкö
- дум, дой либö майшасьöм.

Важгорт сиктлы сиём рытсö паніс кыпыд кыв-
бур. Сыктывкарса канму университетын велöдчысь
Ольга Баженовалөн «Я узнаю тебя по любви» гижöд
корис видзöдысьясöс вунöд-
ны быдлунгья майшасьöмгья-
я да мөвпыштлыны ра-
дейтчöм йылысь.

Важгортын чужöм-
быдмөм ань, а öні Княжпо-
гост районын Серёговса
культура керкаөн веськöд-
лысь Татьяна Каракчиева, тöдмöдінс гöсьтгьясöс ас-
лас сьыланкывгьясөн, öтиыс на пиысь - Важгорт
сиктлы сиём кып. Кывгьяссö енбия морт гижöма
ачыс.

Рыт вылö локтис и сьылысь, Валентина Есева
нима премияа лауреат Наталья Канова, лов шы
дзедöмөн ставөн кывзисны мича кык сьыланкыв.

Коми Республикаса зас-
луженной артисткаяс Анна
Софронова да Мария Чу-
карева, Прометей Чисталёв
нима культура колледжын
велöдчысьяс Райда Просу-
жих да Ирина Погонщикова
лыддисны кывбургьяс,
Борис Пастернаклөн «Све-
ча горела» да Иосиф Брод-
скийлөн «Сретение» шы-
мыртисны ловнымöс вын-
нас. Асланыс гижöдгьясөн
локтисны том поэтгьяс: Алёна Шомысова, Алёна
Старцева, Любовь Ануфриева да Евгения Лобано-
ва. Быдөн вайис чужанін йывсьыс юөр.

Важгортсаяс казгыштис-ны чужан сиктын тöдча-
на местаяс.

- Чужи да быдми Важгорт сиктын. Ичöтнаг пе-
тан вöлөсьтö да юртö чатöртöмөн ветлöдлан,
джуджыд керка йывгьяссö сингьян. И öні на керкаяс-
ыс сикт шöрын джуджыдöсь да статьясь. Олöны
сэні бур да шань йöз, гöсьтгьясыдлы чери-йй, тшак-
вотöс пызан вылö лэптасны да гудöкөн да сьылöм-
йöктöмөн пöттöдз гажöдасны! - юксис казгы-
лөмгьяснас коми культура шöринын уджалысь, удо-
раса ныв Юлия Харкун.

Медгёна мөрчисны сьölөманым тайö кывгья-
сыс: «А медыджыд стрöйбаыс зымвидзö сикт

шöрын. Тайö статья, югыд да
сöстөм вичко. Сэзь рытгьясö
тöвнас да шондї петигөн го-
жөмнас пыр на быттьö кылö,
кызди мыла юргöны сэні
жынннгьяс. Но колян во ар-
нас дугдїс юргыны и тайö
шыладыс. Биыс нуис вежа
вичконымöс...»

Рыт котыртысьяс пиысь
öти, Важгорт сиктын чужöм
да быдмөм морт, поэт, «Арт»
журнал редакцияын уджалысь Елена Афанасьева
висьталіс: «Бöргья кадас вичко стрöйбаын вöлі куль-
тура керка, сійö сотчис, и керкасö бара кутисны
шуны вичкоөн. Колö вöлі мунны сылы би пыр, ме-
дым бөр босьтны ассьыс вежа нимсö. Талун йöз
вöчöны ставсö, медым
вичко ловзис».

Та бöрын удораса по-
этгьяслысь - Альберт Ва-
неевлысь, Галина Буты-
ревалысь, Елена Афана-
сьевалысь - кывбургьяс
лыддисны сыктывкарса
канму университетын ве-
лöдчысь Василий Чупров
да Коми Республикаса
искусствояс гимназияын
велöдчысьяс Светлана
Калинина да Ксения Бозова. А Мария Локачёва
висьталіс Михаил Ерогодский прадед йывсьыс, кодї
служитліс Важгортса вичкоын. Енмö эскысь, че-
лядсö ёна радейтысь морт вайöма коркö гортас
гöрд рёма дзоридзгьяс да козыналöма нывгьясыс,
шуöма, мый тайö маргариткаяс. Лиза (Мария Ло-
качёвалөн бабыс) да сылөн Женя чойыс видзö-
маöсь дзоридзсö, дöзбөритöмаöсь, но кор батынысö
репрессируйтöмаöсь,
маргариткаяс вошöмаöсь
и уна во абу мычысьлө-
маöсь. Мыйтакö кад мы-
сти, кор Лизалөн чужö-
маöсь нин внукгьяс, сійö
бара адзöма вөр дорысь
тайö дзоридзсö да вайö-
ма гортас: «Со маргарит-
каяс! Бөр воисны!» А
сэсса регыд и кывсьöма:
Михаил Ерогодскийöс пö
реабилитируйтöмаöсь...

Рыт сигöртигөн Елена Афанасьева пасйис, мый
татшöм аддзысьлөмгьясыс лöбны юркарын и водзö.
А ми эскам - вичко быть ловзяс!

Евгения ЛОБАНОВА



Юркарса шөр библиотекаын гижысьяслөн ставмирса лунö вöлі Елена Васильевна Габовакөд аддзысьлөм. Нималана гижыськөд мойвиис паныдасылыны Сыктыевкарса 12 номера школарысь 5 классын велөдчысьяслы.

Шань небөгылд бурö велөдö

Библиотекаын зильысьяс аддзысьлөм кежлö дасьтисны «И тянется рука к перу...» небөгьяса выставка. Медводдза здукъясьяныыс нин Елена Васильевна аслас шаньлунөн сибөдiс ас дорас ныв-зонмöс - найö повтöг нин кутiсны сетапны гижысьялы юалöмъяс да став сёлöмсяныыс кивзiсны.

Елена Габова казтыштiс быдöнлы, мый став бурас велөдö шань небөг, кытöн гижысь кöйсö ёртасыны лыддысьяськөд. Челябинд тöдмалiсны, мый медводдза кывбурьяс Елена Васильевна заводитöма гижны дас арöсын, а медводдза небöглөн нимыс вöлöма «Гришуня на планете Лохматиков». Öнi нин нималана гижысьлөн чукөрмöма 38 небөг. Елена Габова нöшта чуймөдiс ставнысö, сийөн мый ичөтдырийыс кöйсöма лоны геологөн, сылы кажитчылöма пукавны бипур дорын да съывны гитара улö.

Ныв-зонлы ёна кажитчис сёрнитны гижыськөд, найö тыртисны Елена Васильевнаöс юалöмъясөн: «Кыдзи лоны гижысьён?», «Мыйла сöмын челядлы гижан-



ныд?», «Гижанныд-ö кывбурьяс?», «Кутшöм тiян олан руыд виль повесыт-висьт гижны босытчигөн?», «А кор Японияд ветлинныд, кутшöм кывийөн эськö сэнi сёрнитинныд?», «Кытысь босытчöны небөгьяс гижöм вылö темаяс?» да уна-уна мукöд. Тöдчис, мый велөдчысьяс дасьтысьмаöсь гижыськөд аддзысьлөм кежлö.

Колö тöдчöдны, мый Елена Габовалөн висьтъясыс, збыльыс, сöстөмөсь, югыдöсь, ёртасыны да öта-мөдöс пыдди пуктыны велөданаöсь. Гижысь став вир-йинас

төдö öнiя томуровлысь пытшкөсса мирсö да олан сямсö.

Аддзысьлөм помын челяд корисны Елена Васильевналысь кырымпассö да ставөн öтув сняйтчисны. Медбöрын гижысь шыасис томуров дорö татшöм кывьясөн: «Олöмад кöть кутшöм сьöд визь оз мун, пыр виччысьöй еджыдсö да эн полöй шогсьöмысь! Шогсигөн паськалö-быдмö сöстөм лолыд».

В.Ю.МАЛЬЦЕВА,
юркарса шөр библиотекаын
уджалысь.



Небөг-гижысь-библиотека-лыддысьсысь... Тайö кывъясыс пыр öтлайнöсь. Гижысьяслон ставмирса лунö юркарса 18 номера библиотека-филиалын лыддысьсысьяс паныдасьлісны нималана коми гижысь Владимир Васильевич Тиминкөд. Буретш юркарса 24 номера школась 5-öd класса велöдчысьяслы уси шуд аддзысьлыны коми народнöй поэткөд.

«Менал герой - коми морт...»

Владимир Васильевич лыддис аслас челядьдыр да томлун йылысь кывбуръяс. Ныв-зон сылысь медводз юалісны: «Кыдзи заводитінныд гижны кывбуръяс?» Та выlö гижысь вочавидзис, мый радейтчöма ныв выlö, сы ради пырöма велöдчыны речнöй училищө, медым мича форманас кажитчыны сёлöм косытысьысылы...

Армияс служитöма ракетнöй войскаын, ковмылöма тшöкыда дасьтывны стенгазетъяс. Командирыс казялöма салдатлысь енбисö да тшöктöма гижны кывбур. Öти войон Владимир Васильевич гижöма «Служил в ракетных войсках» кывбур, мыйысь и босытöма медводдза гонорар.

Став сёлöмсянныс гижысь висытасис мам-бать, ёртъяс да Паджга чужан сикт йывсьыс. Ныв-зонлы кажитчисны сылön пыдi мөвпъяса да сөстөм кывйөн гижöм кывбуръясыс. Найö велöдöны пыдди пуктыны ёртъясöс да



радейтны матыссаос.

Нöшта велöдчысьяс окотапырысь виддалісны библиотекаын дасьтöм ичöтик выставкаысь Владимир Тиминлысь небөгъяссö. Гижысьлön шаньлуныс дзик пыр и ышöдiс ставнысö ёрта сёрниö. Аддзысьлöм дырйи удитісны и шмонитны-серавны, и пöттöдз

варовитны. Челядь окотапырысь виччысьöны нöшта öтчыд аддзысьлыны нималана коми гижыськөд.

Мария Анатольевна ТРЕТЬЯКОВА,
юркарса 18 номера
библиотека-филиалön
веськöдлысь.

Март 3 лунö юркарса челядьлön шөр библиотекаын вöлі нималана драматург Любовь Борисовна Терентьевакөд аддзысьлöм.

Эн вошты йитöдтö школаса ёртыдкөд

Любовь Борисовна висытасис аслас йывсьыс. Чужлöма сійö Сыктыв районас Поёл сиктын. Сыктывкарса канму университетысь филология факультет помалöм бöрын уджалöма роч кыв да литература велöдысьöн юркарса 38 номера школаын. Сы бöрын велöдöма тшöтш и университетын.

Библиотекаын Любовь Терентьева сёрнитіс 16 номера школась 10-öd класса ныв-зонкөд. Медшөр теманас вöлі школаса олöм да ёртасыöм. Сы серти, оз ков воштыны йитöдтö школаса ёртъясыдкөд и уна во мысти, колö тшöкыджыка аддзысьлыны, көть кутшöм инын тэ эн ов. Велöд-

чысьяслы сійö сиис крепыда ёртасыны öта-мöдныскөд тшöтш и школа помалöм бöрын, öд томдырся ёртъясыд пö медся на донаось да бурось.

Любовь Борисовна лыддис ассыс кывбуръяссö, висытасис творчество йывсьыс. Лои тöдса, мый ассыс медводдза пьесасö гижлöма комын во сайын и сійöс дзик пыр нёбöмаось Москваын. Öні сылысь коми кыв выlö вужкөдöм «Енгюгыдыс - тяпиын» («Вселенная в тапочках») пьесасö медводдзаясь петкөдлас Коми Республикаса вужвойтырлön шылада-драмаа театр. Ныв-зонлы Любовь Борисовна козыналіс кырымпаса небөгъяс да корис видзöдны премьеря.

Светлана Юрьевна СТРЕКАЛОВА.



Луздор районса Мутничаын гажаа колльөдिसны Йөвевы. Челядь, налөн батымам, велөдысьяс чукөртчисны ыджыд гаж вылө, кодөс нуөдисны Нина Юрьевна Коснырева да Валентина Фёдоровна Иванова велөдысьяс.

«Гөгыль пө, гөгыль...»

Медводз Нина Юрьевна юөртис, кыдзи тайö гажсö колльөдлöны Англияын. Тешкодь, но сэнй Йөввыв мунö сöмын öти лун медбөръя вторникö Ыджыд видз (пост) водзын. Шусьö «Покаяннöй вторникөн», сы вöсна мый кослунъя заводитчыгöдз быть колö ставлы висьтасыны (исповедуйтчыны). Тайö лунö Англияын нуөдöны быдсяма ворсöм. Но медшöрыс налөн - «Блингьяса котөртöм». 1445 воын вунöдчöм öти нывбаба петöма гаж вылө водздöраөн да киас рачөн, көнй вөлöма зэв мича жаритöм блин. И сэксянь тайö гаж дырйиыс пыр вöчлöны «Блингьяса котөртöм». Ёнджыкасö котралöны тайö ордысьöмас мамыс, а челядь да налөн батыяс горзöны «Пышйы, мам, пышйы öдйö!» Вермысьяслы котөртгөн куимысь колö шыбитлыны вывлань блин да не уськöдны.

Водзö серни нуөдис Валентина Фёдоровна. Сийö бара на казыгыштис, мый коми войтыр гажсö нуөдлисны эз рочгяс моз вежон, а сöмын 3-4 лун. Заводитлисны четвергö да помавлисны шойччан лунö. Быд сиктын вöчлисны йиа пöвъясысь чойяс. Иславлисны дадбөн гозйөн, ныв да зон. Зон пуксьöдлис нывкаос пидзос вылас да исковтлис. Коми исласьлисны и мөд ног. 45 градус кодзыд дырйи пуктывлисны воча кык йизьбм зор, сувтлисны ныв да зон воча, кутчысьлисны киөн да исковтлисны быдөн аслас зорьясöд.

Гаж дырйи ёна радейтлисны и вöвъясөн ветлыны. Вöвъяс да додьяс водзвыв мичмөдлисны лентаясөн да бумагаысь вöчöм дзоридзьясөн. Вöв вылысь кө аддзылисны вöчöм Йөввылос, ставөн сылы копрасьлисны. Сывялисны йөввыдырся коми сывланкывьяс: «Гөгыль пө, гөгыль», «Гажа валяй».

Кольöм шойччан лунö гаж мунис ю дорын. Татчö бара жö чукөртчисны челядь да верстьö. Сиктса клубын уджалысьяс нуөдисны ворсöмгяс. Ок, и гажа вöл танй! Сэсся ставөн öта-мөдлысь корим прöща да сотим Йөввыв. А сэсся юим пöсь тшай, чöсмасим чöскыд шаньгаясөн, пирөггьясөн да блингьясөн.

Миян корр.



Сиктысь – карё ЮОР ВАЯМ

Гаж нуодісны клубын зільысьяс. Матрёнка да Алёнка ворсодісны да гажодісны локтысьясос. Йоввывса быд торъя лунлы аслысполос ордысьом дасьтылісны: йоктісны и хоровод, и чукортлісны флешмоб. Гажодісны локтомаос нощта Лешачок да Петушок. Челяды нуодісны петукъяслон тышкасьом, канатон вермасьом, блин пöжалом. Воліс Маслénка частушкаясон, кодос ворсіс нель арöса Тая Михайлова. Юргісны «Зарни ёль» да ветеран котыръяслон тшай йылысь сьыланкывъяс. Гаж водзын сиктсалы юортлісны ордысьом-конкурсъяс йылысь, медым окотитысьяс удитісны дасьтысьны сы кежлö. Медводз ливкйодлісны ас лосьодом йоввывдырся частушкаяс. Торйон окота пасйыштны Раиса Николаевна Ивашеваос - сы мыңдаос гижöма, молодец! Пырöдчисны ордысьомö нощта Зинаида Егоровна Михайлова, Евгения Николаевна Ивашева. Ачыс гижöма частушкаяс и 4 классын велöдчысь Лиза Мишарина. Кристина Попова, коть оз на куж ачыс гижны, но эз повзы да сьыліс жö.

Мöд ордысьомон вöлі блин пöжалом. Медводза места тані шедöдіс Зинаида Егоровна Михайлова: ок, и чöскыда пöжалöма яя, тшак да яблöга блинъяс. Мöд места вичмис рыська блинысь Ольга Поповалы, коймöд - Александра Михайловалы.

Сиктса нывбабаяслон котыр юортліс Йоввыв-акань дасьтом йылысь конкурс. Медуна вын да сям пуктöма уджас Наташа Кирушева. Став ордысьысьылы вичмисны козиньяс клубын зільысьясянь да нывбабаяслон котырсянь. Ветеранъяслон котыр дасьтыліс ас кион вöчөм-торъяса ярманга. Гаж помасис блинön чöсмасигмоз тшай юомön. Йоввыв дырйид, ок, и гажа вöлі мян!

Оксана ПИНЯГИНА

Март төлысьлөн медведдза шойччан лунö Көрткерөс районьсы Висерса войтыр кыпыда пасйисны Йөввев.



Йөввев дырйи, ок, и гажа!



«Твикс», «Баунти» да «Сникерс» позьö вöчны аслыд. Öнi нималана чöсмаянторъяс лоöны тэнад пызан вылын.



**Дашук
ВЕЛӨДӨ**

«Твикс»


Колö: 200 г мöс вый, 2 стöкан пызь, стöкан джын сахар, 2 банка сгущённой йöв, 300 г шоколад.

Выйсö вундалам кубикöн (3 кубик торйöдны карамеля гудраслы), содтам пызь, сахар, ставсö гудралам блендерöн. Сэсся пуктам гудрассö дозйö, шыльöдам веркөссö да сюям духовкаö. 180 градус дырйи видзам 20 минут.

Скөвöрдаян дасьтам карамеля гудрас. Пуктам 3 кубик вый, кисьтам 2 сгущёнка банка. Видзам би вылын, кытчöдз оз артмы карамель сяма гудрас (20 кымын минут).

Кöдзалöм корж выlö пуктам карамеля гудрассö да веськöдам.

Сывдам шоколад да кисьтам сййöс карамель выlö. Став гудраслысь веркөссö шыльöдам да пуктам кöдзыдiнö. Кынмöм бöрын вундалам торъяс выlö.



«Баунти»

Колö: 200 г йöв выв (сливки), 200 г кокос стружка, 300 г шоколад, 80 г сахар, 50 г мöс вый.

Ичöт би вылын сывдам мöс вый, сахар да йöв выв. Вештам би вылысь. Содтам кокос стружка да бура гудралам. Пуктам кöдзыдiнö час кежлö.

Та бöрын вöчам «Баунти» кодь торъяс.

Глазурь выlö сывдам шоколад. Медым оз ло сук, содтам неуна кöнтусь вый. Кöдзыдiнысь кыскöм «Баунти» торъяссö беддö пысалöмөн суйлам шоколад пиö. Пуктам тасьтiö да виччысям кынмöмсö.

Мич выlö позьö сывдыны еджыд шоколад да вöчны мича сер. Пуктыны кöдзыдiнö.



«Сникерс»

Колö: 400 г öрек, стöкан джын йöв, 50 г мöс вый, 3 ыджыд пань какао порошок, 300 г кос йöв, 1 стöкан сахар.

Гудралам сахар, какао да кизьöр йöв. Пуктам ставсö би выlö да пыр гудралам, медым оз сотчы, но пузяс. Та бöрын вештам би вылысь да содтам весалöм да жаритöм öрек, мöс вый. Гудралам да вочасöн содтам кос йöв. Бара гудралам ставсö. Сук гудрасысь вöчам «Сникерс» кампет да вевтям плёнкаөн. Кык кымын час кежлö пуктам кöдзыдiнö.

Нянь га сов!





Эз на удитны шойччыны Сочиса Олимпиада бöрын «болельщикьяс», бара на найöс виччысьö ыджыд шоу, мунасны XI-öd төвсә Паралимпиадасә ворсöмьяс. Спортсменьяс ордйыясны Сочыин март 7-16 луньясö.

Виччысям медальяс!

Паралимпиадаö пырöдчас 40 странаысь 1.350 спортсмен. Вермасясны 64 комплекта награда вöсна 5 паралимпийской спорт сикас серти - следж-хоккей, кöляска вылын кёрлинг, биатлон, лызьон котралом, гора-вывса спорт.

Паралимпиада став мирын лыддьсьö сэтшöм жö ыджыд спортивной гажöн, кутшöм и Олимпиада. 10 во сайын Паралимпиада Россияын эз на сэтшöма нима, но миян спортсменьяс, асланыс вермытöм вылö видзöдтöг, сямисны петкöдны странанымöс мирса паралимпийской öтмунöмлön лидерьяс лыдö.

Медводзаысь Россияса спортсменьяс пырöдчисны Паралимпиада ворсöмö 1988 воын Сеулын. Альбервиллын миян паралимпиечьяс босьтисны коймöд места командаяс пöвстын, 21 медаль шедöдисны.

Водзö - Лиллихамер, Нагано да Солт-Лейк-Сити, но медбура петкöдчисны 2006 воын Турины. Сэки командаяс пöвстын шедöдисны медводза места, босьтисны 33 медаль: 13 зарни, 13 эзысь да 7 бронза. Ванкуверын Россия лои мöдöн, а öтув зачёт серти - медводзаöн медальяслön лыд серти.

Россияса командаö пырис 83 спортсмен. На лыдын нималана нин спортсменьяс - Ирек Зарипов, Кирилл Михайлов, Сергей Шилов, Анна Бурмистрова, Мария Иовлева да нöшта том спортсменьяс, кодьяс сöмын на заводитöны петкöдчыны бöрийöм спорт сикасын. Медводзаысь на Россияса паралимпиечьяс петкöдчасны став спорт сикасас. Сидзкö, медальяс шедöдан поэянлуныс лоö унджык.

Вит спорт сикас кындзи эм выльпыртöм - гöравывса лыжиа спортö пырис парасноуборд.

Буретш та вылö дасьтöма 680 метраа трасса. Гöравывса ин сетисны поэянлуныс вöчны трассасö сьöкыдöн, сидзкö, видзöдысь вермас аддзыны спортсменьяс костын медальяс понда ёсь ордйысьöм.

Кутам лача, мый Паралимпиадаын шедöдöм медальяс сетасны миян спортсменьяслы выль вын мунны водзö вермöмлань.



«Коми йöзöдчан керка»
Коми Республикаса
автономной учреждение.
Веськöдлысь
Н.Н.БЫКОВСКАЯ
Гл.редактор
Г.В.МАКАРОВА



Газет панысь:
Печать да юөр сетан Коми
Республикаса агентство.
Регистрируйтöма
2007 вося ноябрь 28 лунö
йöзлы юөр сетом да
культураса озырлун видзöм
кузя оланпасьяс
збыльмöдöм бöрся
видзöдысь федеральной
службалön Беломорской
управлениеын.
Регистрирунтан пас:
ПИ №ФС 3-0686.

Социальной тöдчанлуна
гижöдыясö йöзöдöма «Коми
йöзöдчан керка» автономной
учреждениелы печать да юөр
сетан КР-са агентствöн
вичмöдöм сьöм вылö.



Редакциялön адрес:

167982, Сыктывкар,
К.Маркс улица,
229-öd керка,
401-402 кабинетьяс.
Тел. 24-12-22, 24-36-49.
E-mail: Yologa@mail.ru



**Редакцияын
уджалысьяс:**

**том йöзлön мытшöдьяс
юкөнön веськöдлысь –**
Надежда Пунегова;

**письмö юкөнön
веськöдлысь –**
Екатерина Микушева.



Медводза лист бокас
снимокыс
Оксана
Пинягиналön.



Авторьяслön мөвпяяс оз
пыр лöсяныс редакциялön
видзöдласкöд.



Тираж – 561.
Гижöдчан индекс – 52099.
«Йолöга» газет петö
1991-öd восянь
вежоннас öтчыд, комиön.



Печатьö кырымалан кад:
график серти – март
тöлысьлön 5-öd лунö
16 часын; кырымалöма
печатьö 16 часын.
Газет печатайтöма
«Коми республиканской
типография» ООО-ын дась
оригинал-макетьясысь.
167610, Сыктывкар,
В.Савин улица, 81
Заказ №



Мастер-КЛАСС

Аски Март 8 лун. Окота мамлы, баблы, чойлы да и радейтана нывлы съёлөмсянь вöчны козин. Сыктывкарса 80 номера челядь садйын зильысь Вероника Нестерова бара на вöзйö газет лыддьысьяслы видлыны ас киöн вöчны панно.

Мамуклы дзоридз



ТА ВYLÖ КОЛÖ: пластилин (öти рöма, а позьö весиг важ колясьяс та вылö видзны), пластмас тасьтi (абу кö, позьö аслыг вундыны картоньсь колана ыджгаöс), аэрозольной краска да стэк.

МЕДВОДЗ небзьöдам пластилин. Сэсся вöчалам гöгыльяс. Найöс тэчам тасьтi пельöсö, кыдзи петкöдлöма серпасын, да артмöдам наысь ичöтик дзоридзьяс. Та вылö стэк отсöгөн либö фломастерлөн крышка помөн личкыштам шöрас да вöчам розьяс сяма.



СЭССЯ лепитам пластилинысь ичöтик розаяс да корьяс.

ТА БÖРЫН вöчам ыджыд роза. Та вылö пластилинысь вöчам гöгрöс бедь, сэсся торйöдам сийöс 6-7 тор вылö. Наысь вöчам розалысь корьяс.

КИÖ босьтам öти тор да артмöдам сыысь гöгыль. Тайö гöгыльсьыс вöчам розалысь шöрсö.


СЫ БÖРЫН босьтам мöд тор да сiдзижö паськöдам дзоридзлы кор вылö, пуктам воддза вылас.

АРТМÖМ дзоридзсö топöдыштам панно шöрас, лöсьöдыштам корьясö.



СЫ БÖРЫН пластилинысь жö вöчам дзоридз корьяс, а стэк отсöгөн мичмöдам найöс.

МЕДБÖРЫН пызьям аэрозольной краскаөн.



Со и дась ичöтик козин - мича да съёлөмтö вöрзьöдана. Колис сöмын козьनावны сийöс.